

Tito

Jachuayama

¹ Atše Pablo, Bëngbe Bëtsabe oservená sëndmëna y Jesucristbe ichmoná entšanga jábuayenama, chë Bëngbe Bëtsá chabe entšanga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bétsemnama, mondoyena jtsamëse.

² Lempe chca sëndama, er Bëngbe Bëtsábeñe jtsošbuáchiyëse, atše sënt sobátmana chë nÿetsca tescama yomna tšabe vida jtsebomnama. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entšanga chca vida jtsebomnama; ³ y nÿa chama tempo tojóshjangó ora, chë entšanga jábuayenama, soyëngaca Bëngbe Bëtsá chabe palabra šojinýanýé, ndayá Jesucristo entšangbiama yochjanmama; y chca jábuayenama atše palabra šmonjabonyé, Bëngbe Bëtsá, bëngbe Atsebacayabe mändoca.

⁴ Tito, quem tsbuanácha cbontsabobiamná. Atše Jesucristbe soyëngama entšanga sënjanabuayiná ora, aca chábeñe contsanošbuaché y nÿets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ábeñe tšabe bendicionënga chaotsemnama

chata chaboma, y chaboma aca ainaniñe tšabe ebionana chacotsebomnama.

Titbe trabajo Creta luaroca

⁵ Atše Creta luaroca tcbonjéftsanboshjona, ntšamo chentše jamama enjetsashbencá chacomama, y nÿetsca pueblënguenache chë ošbuachiyëngcá enefjuanëngbeñe bëtsëjemëngcá amëndayëngä jtsemnama chacubuáyanama, ntšamo tcbonjaftsemandacá. ⁶ Canÿa bëtsëjémama uabuayaná mëntsá bontsemna: chaotsiyena ntšamo chabiama ndocná chaondétsichamo ndoñe tšabá yontsama ca; nÿe canÿe shembásabe boyá; chabe bäsengna, Jesucristbeñe ošbuáchiyëngä chamotsemna, y chamotsiyena, ntšamo ndocná chaondayana chënga nÿe jenomándama ntsobencá y nÿe ntšamo tmojtsebošcá imojsiyena ca, o chënga chëngbe bëtsëtsanga o mándayëngä ndoñe montsayaunana ca. ⁷ Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonýeyeca, cha bontsemna jtsiyenana, ntšamo ndocná chaondayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondétsama; ndoñe chaondétsiyena nÿe rábiaca jtsemnama; ndoñe chaondétsetmó; penzentsero ndoñe chaondétsemna; y ndoñe chaondétseboše nÿe paselo becá crocénana jtsebomnama. ⁸ Pero chabe yebnentše posada entsanga júyentšamiama sempre chaotseprontana, tšabe soyëngä chaotsebínÿnama sempre chaotsentšena, botamana juabnayá chaotsemna, ntšamo Bëngbe Bëtsabe bominÿiñe tšabá yomncá chaotsiyena,

nÿets tempo Bëngbe Bëtsábioye chabotsadorana, y cachá nÿetsca soyënguiñe jenomándama chaotsobena. ⁹ Cha bontsemna nÿets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyëngaca ínÿenga añemo chaotsatšatnama, y chë soyama contra tmojtsemnëngä jáyënjanama, ndoñe tšabá montsamama.

¹⁰ Cha chca bontsemna, banga nÿe ndëemandánëngä jtsiyenama bošënga mondmëna causa, y chënga mondmëna, nÿe ndaye ndoservena soyëngama yapa oyebuambnayëngä y ínÿenga áingñayëngä, y chcanga más mondmëna chë nÿetsca ošbuáchiyëngä base bobachtema chë más delicadentše tétšenëngä jtsemnama yojtsamna ca mondbétsichamënguentse.

¹¹ Y entseyta chëngbiyoje jtayáchetana, er chënga jamana ba pamíllanguentse nÿetscanga Jesucrístbeñe ošbuáchiyana chamotsajbanama. Chënga chca mondbétsama, chë ndoñe yontsamna jtsabuátambayama soyëngä jtsabuátambayëse, nÿe paselo crocénana jongánama.

¹² Enjamna canýa, ndabiama entšanga jtsichámua cache Creta luarentša diosëngbiama oyebuambnayá canjamna ca, y cha cachabe luarentša oyenëngbiama mëntšá tonjánayana: “Creta luarentše oyenëngä, nÿets tempo bosterëngä mondmëna, ainana ndbomnëngä y oyënjayëngä nÿe becá jasama bošëngä ca.” ¹³ Y chca ndegombre cha tonjánayana; chíyeca chënga jabuache cochjucácana, chca, chënga Jesucrístbeñe chamotsošbuáchema y chamotsobedecena

chë buatëmbana soyënga, chë ndayiñe bënga mondošbuaché; ¹⁴ y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

¹⁵ Chë ainaniñe bacna juabnënga ndbomnënga y chca juabnëngaca ndëmandánënga, nÿetsca soyëngama jtsejuabnayana mo ndegombre tšabe soyënga cuافتsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámnaca jtsejuabnayana mo bacna soye cuافتsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama. ¹⁶ Chënga jtsichámuana Bëngbe Bëtsá imuábuatma ca, pero ntšamo tmojtsama soyëngaca jtsinýinýnayana chca ndoñe ndegombre yondmënama. Chënga Bëngbe Bëtsabe bominyiñe puerte bacna entšanga mondëmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

2

Soyënga ntšamo chë ndegombre buatëmbánana endmëncá

¹ Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá. ² Cochjayana chë bëtsjémëngna chamotsemna cachënga nÿetsca soyënguiñe jenomándama obenënga, nÿetscangbiama mo uámana entšangcá utabnënga,

ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

³ Cachcá, chë bëtsanana shembásenga chamotsiyena mo Bëngbe Bëtsábiye adorayëngcá, uayátsenayënga ndoñe chamondétsemna, ni tmoyënga. Entsamna chamotsiyena tšabe soyënga jtsamëse; ⁴ chë tobiašënga chamotsinýänýná y chamotsabuatambá ntšamo chëngbe boyanga y básegna jtsababuánÿeshanana, ⁵ ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentşénana, nÿetscángaaftaca tšábenga jtsemnana, cachëngbe boyángbiye jtsayaunananana, chca, ndocná chaondétsobena Bëngbe Bëtsabe palabrama bacá jatóyebuambnayana, ntšamo chë tobiašënga tmojamama.

⁶ Cachcá, chë bobontsënga añemo cocht-satšatnaye cachënga jenomándama chamotsobenana, ⁷ y chënga cochjínýanýiye ntšamo yomna jtsiyenana, cach aca nÿetsca soyënguiñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama, ⁸ chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiama jayanama.

⁹ Chë nÿets tempo nÿe ínÿabiama oservénënga

cochjábuayenaye, chëngbe nduiñéngbiyoje chamotsobedecénama, soyënga chamotsama chënga chamotsóyejuama, y yajuatsanënga ndoñe chamondétsemnاما.¹⁰ Ndoñe chamondëtsatbëbana, pero aíñe nÿétscañe tšabe palabra bomnënga chamotsemna. Chënga chca entsamna, chca, ínyënga chámuinë y chamojuabó tša botamana ché buatëmbana soyënga, Bëngbe Bëtsá bëngbe Atsebacayabiama yomna ca.

¹¹ Er Bëngbe Bëtsá bëngba šonjinýanë cha bëngbe tšabiamama juabnënga yobomnama, y chca, cha tojama nÿetsca entšanga chamotsobena atsebácanënga jtsemnاما. ¹² Chë Bëngbe Bëtsabe juabna bëngbe tšabiamama, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámnama šontsabuatambá, cabënga jenomándama jtsobenëse, ntšamo Bëngbe Bëtsabe bominëniñe tšabá yomncá y cha jadórama soyënga jtsamëse. ¹³ Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnama te, Bëngbe Bëtsá obená y Atsebacayá Jesucristo, buashinëyaniñe y canë corente uamanacá yochjésabo ora. ¹⁴ Cha chabe derecho vida jtsobomñama cachcá tojanonyá y bëngbiama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bëngba játsebacama, ainaniñe ndocna bacna soye ndbomnënga jábiamama, bëngba chábenga chamotsemnاما, sempre prontánënga ntšamo tšabá yomncá jtsamama.

15 Chca cmontsemna jtsabuátambayana, chënga becá añemo jtsatšatnayëse, y jtsinýanýnayëse chënga bacna soye tmojamama, chë nÿets condbomna mándoca jucácanëse. Ndoñe catjaleséncia ndocná chaondayana aca mando ndoñe condbomna ca.

3

Ndayá Jesucristbeñe ošbuáchiyëngä yojtsamna jamaná

1 Cochtsama chënga chamuatenójuaboma chë mandadënga y inÿe mándayëngä chamotsayaunananama, chamotsobedecénama, y tšabá yomncá jamama sempre chamotse-prontánama. **2** Ndocnabiama ndocna bacna soye chamondétsoyebuambná, penzentserëngä ndoñe chamondétsemna, ndayá nÿetscángafaftaca natjémbana jtsiyenama bošënga, tšabá mándbomnëngä, nÿetscanga tšabe ainánaca imojtsénýama entšanga jtsinýanýnayëse.

3 Er bëngnaca tempo monjamna Bëngbe Bëtsabe soyëngama ndosertánëngä, ntšamo Bëngbe Bëtsá endëmandacá ndoñe quemjátanama, ingñénëngä y mandánëngä monjamna nÿetsca bacna soyëngä jamama juabnëngaca y nÿe quem luarentše tšabá jtsemnama juabnëngaca. Bëngä monjaniyena nÿe bacna soyënguiñe juabnaye, ínëngä uantšaboše. Inëngä bëngä šonjanébuayënya y bëngä nÿetscanga monjanenáboyënya. **4** Pero Bëngbe Bëtsá, bëngbe Atsebacayá, bëngbe tšabiama juabna yobómnyeca y tša šuababuánëyeshanama šonjaninýanýé ora, **5** cha šonjanatsebacá, pero ndoñe nderado bëngä ndaye tšabe soye tmojanmama, ndayá cha

bëngbiamá tbojanongmeyeca. Cha šonjanatsebacá, bëngbe bacna soyënga jabuajuánase, y chë Uámana Espíritu jujabuáchëse, bëng mo tsméma entšangcá chamotsemnáma, ntšamo tempo yojamncá ntjatsjuabnaycá y ntjatamcá. ⁶ Bëngbe Atsebacayá Jesucrístbeyeca, Bëngbe Bëtsá tojanma Uámana Espíritu bëngbe ainaniñe nÿets tempo chaotsemándama y bëng chašotséjabuachanama, ⁷ chca bëng, Bëngbe Bëtsá bacna soyëngama šojaperdónanga y bëngbe tšabiama juabna bómnavayeca tojayana chabe bominýiñe tšábenga imomnënga, chamotsobena cha yobomna soyënguentšana bëng mo ndayá cuafstsétocancá jójengacñama, y chca, chábeñe jtsošbuáchiyése, chë nÿetsca tescama yomna tšabe vida chamotsobátmanama.

⁸ Chca, lempe ntšamo tijayancá nÿa ndegombre endmëna, y atše sëntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentšena chë tšabe soyënga jtsamama. Chë buatëmbánana puerte tšabá endmëna y nÿetscangbiama bëtscá endoservena. ⁹ Inýenga nÿe ndoservena soyëngama jabuachana tmojtsenatsétsná ora, y anteungbe cuentëngama chamojtsoyebuambná ora, ndoñe cattsontremetena; ndoñe cattsama cach tšëngافتanga ndoñe tšabá jtsenëyeunananamcá, y judiëngbe leyëngama ndoñe ínýengaftaca cattsenpéliaye. Chca jtsamana tondayama ntoservénana, y nÿe bonamente chca jtsamana.

¹⁰ Nderado nda tojtsama entšanga ndoñe cachcá nÿetscanga chamondétsejuabnama y chamotsenpéliama, canÿe o uta soye

cochjabuayená ndoñe tšabá tonjamama; pero cha ndoñe tcmonjóyeunase, chentšana cháftaca ndoñe más cattsóyebuambnaye. **11** Chca cochjama, er aca cochanjátatshembona canýa chca tojtsemná, chabe juabna tojatrocá bacna soyënga jtsejuabnayama. Chë soye y chë inýe bacna soyënga ntšamo cha tojtsamcá, jtsinýanýnayana cha ibojtsemna castiganá chama jtsemnama.

Inýe soyënga Titbiama

12 Atše, Artemas o Tíquico ácbose chajichmó y chocha chaojáshjangó ora, ndayánaca cochjama Nicópolis puebloye aca jama atše jinýama, er atše sénjajuabó chentše chë uaftenéntscuana jëftsemnana. **13** Lempe ntšamo chacojobenacá, cochjuájabuache chë ínýenga obuauuyayá Zenas, y Apólosnaca; lempé ntšamo chata ibojtséjabotcá cochjátusataye, ínýoye jama jatóntshama chamobenama y benachéjana tondaye chaondétsabuáshebenama. **14** Atše séntseboše, bëngbe entšanga, chë bëngcá Jesucristbeñe ošbuáchiyënga, chamotsentšena chë tsabe soyënga jtsamama y chë puerte ujabótënga jtséjabuáchanama, chca, chëngá tondayama ndoservena vidënga ndoñe chamondétsbomnama.

Pablo Títbiowe jadióšoftanama

15 Njetscanga chë átšeftaca montsemnëngnaca cmontsechuaná. Atše cuenta cochjácheuaye njetscanga chë bëngá imuababuanýeshanéngbioye, cach bëngcá Jesucristbeñe ošbuáchiyana bómnyeca. Atše, Bëngbe Bëtsá séntseimpadana, cha chaoma ábeñe tsabe bendicionënga chaotsemnama.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 11 Nov 2022 from source files
dated 29 Jan 2022
19104c0e-9046-5ff3-82fb-eb838c88dcf9